



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

45. Kalenderwoche – ab 2. November 2008

Schgandahl

Nee, eischendlich isses werglisch e ganz scheenor Schgandahl, das muss isch jedzde ma hier an dähr Schdelle ganz offn zugähm! Ja, isch muss misch hier jedzde ma audn! Es muss raus! Nee, isch bin nisch schwul! Isch hab nischd mid dähm Herrn Mai, wie mansche ja schon gedachd hamm kenndn, weil mir ehm schon ibor zwanzisch Jahre zusamm off dor Biehne rumhubbn dun. Nee, das isses nisch! Es is ooch nisch, dass isch eene Bank in de Bleide gedriehm hab, nee. Isch hab ooch kee schwarzes Gondo in Lischdenschdeen. Es is viel schlimmor - isch als bekennendor Sachse hab schon seid viele Jahre eene Gudste, die is aus Bayern! Ja, un was noch ohm droff komm dud, meine Haubdwohnanschrifd dud ooch in Bayern laudn. Desvorweschn hab isch ja ooch in Bayern gewähld. Ja, wo girzlich in Bayern Wahl gewähns is, hab isch dord midgemachd!

Jaja, Sie hamm sisch villeischd schon gewunnord, dass de CSU so eingebrochn is in Bayern - das bin isch gewähns! Nähmlisch! Also, von dähr Seide hähr gesäh, isses villeischd e mildorndor Umschdand, dass isch mid Bayern vorbandeld bin. Isch bin sozusachn als Sachse in Bayern eingeschleusd - so andorgaffor! Als eene Ard finfde Golonne! Isch mache dähn Bayern dähn bolidischn Garaus! Allordings bin isch ehm doch de meisde Zeid in Gemnidz. Desvorweschn dud sisch das fiehr de Bayern noch nisch ganz so bemärgbar machn, dass da eenor is, dähr nisch fiehr de bayrisch-ordhodoxe Digdaduhr is. Nee, isch bin schon immor fiehr de Demmogradie gewähns. Ooch im brivadn Bereisch! Isch will ooch daheeme meine Meinung sachn derfn!

Allordings scheid ehm de Demmogradie nisch bloß in Bayern nisch mähr so in Mode zu sein. Das eenzische, was bundesweid von dor Demmogradie ibrisch gebliehm is, das sinn de Wahln. Da darfsde ma deine Meinung dursch e baar Greuzeln zum Ausdrugg bring. Abor sonsd? Versuchn Sie

ma in eenor Zeidung ihre Meinung zu sachn, wenn dor Scheffredagdöhr eene anre Meinung hamm dud! Odor im Fernsähor! Odor du mussd ehm gleisch een Schgandahl anzeddln, wie dähr Reisch-Rannidzgie. Dähr kann sich das abor leisdn. Dähr muss keene Angsd mähr um seine Karrjähre hamm. Dähr hadse ja schon hindor sich.

Odor vorsuchn Sie doch ma in ihrer Glidsche ihm Scheff de Meinung zu geischn. Odor wenn sie Beamdor sinn... - odor im Fußball - da darf keenor was geeschn dähn Drähnor sachn. Dor Ballagg had wahrscheinlich ooch gedachd, dass mor in eenor Demmogradie ma seine Meinung sachn darf. Wemmor sogahr Mannschaftsgabidähn is! Abor das darf mor ehm nisch!

Was mor darf - mor darf sich audn! Mor darf sich selbor endhillen! Da dun sich alle driebor frein. Abor de eischne Meinung...? Bloß immor dann darfsde die hamm, wenss eene Meinung ibor was is, was disch nischd angehn dud. Wo du keen ibor dir hasd, dähr womeeschlich eene anre Meinung hamm dud. Das is allordings nisch bloß in Bayorn so!

Eduard Sachsenmeyer